



Dhankhar-i tatong Tir
menden nungi anen

Prannoy-i match points 5
kümzüka 2buba round-i iogo

Barak River Basin management atema senden Kohima nung amen

Dimapur, Chiteni/July 22 (TYO): Barak River Basin ketdangsütsü sentong aser Indian-EU initiative aser Brahmaputra board lungjemer inyaksü asoshi shisa lemsatepba senden ka July 22, 2025 nü Nagaland Civil Secretariat Kohima nung CS conference hall nung mena liasü.

Director GIZ, Laura Sustersic ajanga senden tenzüka jembidang, EU aser India tsüngta lungjemba ya yimya tajungtiba amshitsü, Indian context nung European yimya amshitsü aser water resources ketdangsüba nung sustainable solutions yangertsü nükjiding lir ta ashi.

Water Management ya angatettepa inyaksü area tongtipang ka lir, koba ajanga rongsenketzüng terenlok, tesunep, security, agriculture, fisheries, energy aser libajen nung yarir, ta Laura Sustersic-i ashi.

Ganges Brahmaputra hydrological system aser Barak River basin nung rangloker water management nung India yahritsü asoshi GIZ ajanga project balala inyakba indanga lai rateta ashi.

Nagaland nung libajen meraksatsüsa sustainable development lenmangtem nung temulung agütsütsüla aser terenlok nükjiding ataloktsü asoshi inyakba mapang tebour tajung libajen wazüka ayutsü asoshi lenmang bushitsüla, ta Laura-isa ashi.

Chairman, Brahmaputra Board, Dr Ranbir Singh IAS ajanga senden nung jembidang, state nung tzu agi anüngba tebilemstü ya kanga tulu lir ta ashi aser state nung tzu peria angutsü asoshi tekeraba nung mera agitsü nüngdakba

lemsatepa liasü.

Nagaland ya water basis küboki aiter asünung, iba tebilemstü aser nükla aliba tesemtem yanglutsü asoshi angatetsü tongtipang, ta Singh-i ashi.

Singh-isa stakeholders ajunga dang pei shilem mapa temulung agüja inyaksü aser tarutsü putu asoshi water resources tajungtiba nung ketdangsütsü ayongzüka liasü.

Senden tembanga jembidang, tzünglu peria aruaka Nagaland nung district pongu tashi 'water distress districts' ta sangdonga lir aser Nagaland nung talisa mongpu mapang tzu agi kanga anünger, ta Chief Secretary, Dr J Alam, IAS ajanga ashi.

Brahmaputra board ajanga project balala inyakba ajanga state nung teyari jenti ngua arur aser Barak river basin management plant yagia state asoshi kasa tajangzük alitsü, ta pai ashi.

Iba project yagi tarutsü nung inyaksü maongka jenti lapoktsütsü aser state nung water management dak sendakba nung tarutsü nung sentong tajungba yanglutsü asoshi nisung tejangja den sendaktepba nung yaritsü, ta Dr J Alam-i ashi.

Pai Brahmaputra board dang Nagaland state asoshi sentong balaka yanglutsü ayongzüka liasü.

IEWI/GIZ team ajanga 'Overview of the India-EU partnership and achievements in river basin management' indang PowerPoint agüja liasü. General Manager Brahmaputra Board Abhay Kumar ajanga Barak Basin management plan indang nung jembi aser Chief Engineer WRD, Er. Thepfusalie Gozie-i melepzüng o jembia liasü.

fashion tsütsü lenir asütsüsa jenjang nung lir.

"Northeast nung nüburtemi takum alitsü, innovation adokdaksütsü, aser alima sapang nung India indang sobaliba tajung shisangdaksütsü asoshi handlooms aser handicrafts nung senmang tajung amshitsüla," ta Scindia-i ashi.

Union Minister of Textiles, Giriraj Singh-ia, tanü high-level task force senden nung North Eastern states temi lemsatepba shisatsü tajung nung Ministry of Textiles ajanga bendanga agütsür angatettepa inyaksü, ta ashi.

CM-i NHIDCL dang mapa tekeraba nung inyaksü tuyu



Kohima, Chiteni/July 22 (TYO): Mongulbarnü Nagaland Chief Minister Dr. Neiphiu Rio-i Kohima anasa Phesama nung National Highway (NH)-2 nung alinen agi kongshia aliba tesem semdang aser tesendaktep akhi ama yanglushitsü aser tarutsü nung iba ama timtem majurutsü asoshi tekeraba nung mera agitsü ayongzüka liasü.

Iba mapang Chief Minister-i iba tesem nung alinen tanen makai aliba tebilemstü lemsatep aser Nagaland lisa majungba asoshia pai shisem.

"National Highways ya linük ka asoshi takum lenmang lir, tesendaktep aser rongsenketzüng inyakyim asoshi tongtipang," ta Rio-i ashi aser iba lenmang tekeraba nung yanglushitsü atema state sorkari mapa inyakterem den yariteptar ta ashi.

"Iba tebilemstü ya mapang ka atema kisüng masü, ibai asenok tanur asüadang nungi ataloka liasü. Alinen aser lenmang nung tetsükdaksü agütsüba tebilemstü ya arishi tepiyong lir," ta pai ashi aser traffic jenti senzütetsüsa NH ama lenmang danga bushitsüla, aji mesüra yimsüng lenmang ya gari tulu senzüba ajanga khen nung raksatsü ta ashi.

Kasa mapang National Highways and Infrastructure

Development Corporation Limited (NHIDCL) ketdangsürtem den sensaksemba mapang CM Dr. Rio-i alinen alua alidak concrete, iron rods aser akoktsü dang süra piling amshitsü ashi.

"Khen atema teinyak. CC apu shidak yangluang, aser nüngdakra jana-reja tiptema ajangtsü asoshi flyover yangluang," ta pai ashi.

Tzünglu tanen makai aruba ajanga lenmang tekübokleni osettsüset bener aitsü tasak kumdaktsür, ta Executive Director of NHIDCL, R.P. Singh-i Chief Minister dang ashi.

Lenmang meters 57 shi atsüoka iogo aser meter 37 shi kanga mejungi raksaogo, aser tzüngsang tajungba kumra, khen asoshi yanglushiba maparen ya August 18 tashinung renemtsü, ta pai ashi.

Meyi mapang mapa tulu inyaksü tasak lir ta Rio-i ashi saka agency tem dang temporary passage yanglutsü aser tzünglu aruba ajema akumba sülen concrete mapa tenzüksü ashi.

"Shidakba alinen ya August-September mapang alutsü imlar, anungji mapang talangka amshitsüsa sentong alitsüla," ta pai ashi.

Chief Minister-isa iba lenmang koda tongtipang ta asüba angatetdaksü aser iba lenmang ya küm shia Hornbill

Festival amungba tesem Naga Heritage Village, Kisama den sendakteper ta ashi.

"Taoba küm mapangtong tashi lenmang yanglushiba mapa inyaka liasü. Tangbo asenoki kanga jelia sentong yanglua NHIDCL, district administration aser danga stakeholders den amalitepa inyaksüla," ta pai ashi.

Rio-i ali anenzüka alua aliba kanga kumdanga indoktsü aser jana indokba mapang anasa aliba kecha meraksatsütsü shia liasü.

"Nisungi senzüka yutsüba ajanga Nagaland nung season ana dang lir - mulushi season aser aoyi season," ta pai asayamenüa ashi aser stakeholders ajunga dang sentong tajungba nung yanglua külemi teka amteper inyaksü ayongzüka liasü.

"Asenoki mapang tatong ataa malitsüla. Asenok ajak renema liti," ta Chief Minister-isa ashi.

Chief Minister meina Deputy Chief Ministers T R Zeliang aser Y Patton aser legislators S Keoshu Yimkhiung, Kropol Vitsu aser Kevipodi Sophie nungertem arua liasü.

Tzünglu kanga sashia aruba sülen Kohima aser Imphal sendaktepba NH-2 lenmang ya Southern Angami region nung tesem kar nung June 2 nü atsüoka ai.

India textile sector anitsü NE dak nükla lir

Dimapur, Chiteni/July 22 (TYO): Northeast nung handloom aser handicrafts sector tashi itshitsü nung rangloker high-level task force senden ka July 22, 2025 nü amenba nung Union Minister of Communications and Development of North Eastern Region (DONER), Jyotiraditya M. Scindia dena liasü.

Iba mapang India indang sustainable fashion revolution anitsü Northeast dak nükla peria aliba indang Union Minister-i lemsatepa liasü.

Eco-friendly yimyatem amshiba, artisanal expertise aser dangar dang nungi alakteta teka mapa nung ajungba ajanga region ya alima sapang nung

Civil Aviation Ministry den air connectivity atema jembi

Dimapur, Chiteni/July 22 (TYO): Transport Department, Government of Nagaland nungi Robert Longchari, Commissioner & Secretary lenisüba kübok ketdangsür telok kati state nung air transport dak sendakba nung tongtipang ki o jen aser tesendaktep indang jembishinütsü asoshi July 21, 2025 nü New Delhi nung Ministry of Civil Aviation semdanga liasü.

Iba mapang Asangba Chuba Ao, Joint Secretary, Ministry of Civil Aviation aser MoCA, DGCA aser Airports Authority of India nungi ketdangsürtem den senden mena liasü.

Parnoki airstrip development, heliport yanglutsü, Dimapur Airport upgrade asütsü aser NSOP Plus scheme kübok helicopter services ulushitsü indang jembia liasü.

Nagaland nungi aoba

delegation nungya Additional Secretary Sentiwapang Aier, Officer on Special Duty (OSD) to the Chief Minister Hatpha Wangnoa, OSD Transport M. Ababe Ezung, aser Deputy General Manager, Nagaland State Transport (NST), Thomas Kiutsangmong nungertem liasü.

Iba senden nung tayimtsü tesendaktep tajungba kumdaktsütsü asoshi ajaki süoki ia bilemba indang lemsatepa liasü.

Thenusou-i tajemtsü tzü facility lapoktsü



Kohima, Chiteni/July 22 (TYO): Kohima Municipal Councilor Thenusou Sekhose Yhome-i, Ward No. 6 nung D Block kübok Sector C nung tawa yangluba ring well aser tajemtsü tzü facility ka July 22 nü lapoktsüogo.

Iba facility lapoktsüba sentong nung o jembiba mapang Councilor Thenusou-i, colony nung terenlok maparen balala benoka inyakba indang lemsatepba den, Urban Development Department aser Municipal Affairs Department dang item mapatem atema scheme balala kübok senotsü teyari agütsüba atema pelaba lemsatepa liasü.

Mapa tembanga inyakbatem

kanga junga inyaktetba atema tenünsang agütsüba mapang lai, item infrastructure tem anepalutsü atema teyari agütsütsü asoshi telemtetba agiba atema sector balala nem tenünsang agüja liasü.

Lai, item project tem ya pei meyong ama agitsü ajungshiba den kanga junga anepalutsü ayongzüka liasü. Laisa, maneni teka amtepa inyaktsü aser terenlok maparen maneni bener arutsü atema nongita yaritsü ayongzüka liasü.

Iba facility lapoktsüba sülen councilor meina D Block Panchayat aser lanur lokti tentet lenirtemi la tenure mapang benoka inyakba project tem

semdanga liasü. Project tem rongnung tesem asem nung kilentsü yanglushiba, tajemtsü tzü facility, footpath ka yangluba aser GPS D Block atema footbridge ka yangluba, Sectors C aser D nung footpath yanglushiba aser footpath tasen ka tajungba küma yanglushiba densema lir.

Kasa mapang nung D Block Panchayat chairman Kevi Vizo, shiba lenisüba nung iba sentong agia liasü pai, colony ajungkettsü atema terenlok maparen balala benoka inyakba atema Councilor Thenusou nem tenünsang agütsü. Paisa, la tarutsü takok nung aotsü imlaja ataba lemsatepa liasü.

Viswema nung PMMVY enrolment drive agi



Dimapur, Chiteni/July 22 (TYO): Pradhan Mantri Matru Vandana Yojana (PMMVY) kübok enrolment drive ka, aser tetsürtem atema welfare scheme tem dak sendakba nung awareness sentong ka July 22 nü Viswema yimtsüng Panchayat Hall nung agiogo.

Iba sentong ya Kohima District Administration aser SANKALP - District Hub for Empowerment of Women (DHEW) na longjemer Beti Bachao Beti Padhao (BBBP) inyakym nung shilem ka ama agiogo.

Iba sentong ya yimdak

yimtsüngtem nung aliba tetsür aser aiür chanutem nem parnok health aser empowerment dak sendakba nung scheme balala indang osang agütsütsü aser service balala agütsüba agidaksütsü nükjidong nung ayongzüko.

Sentong ya CDPO Jakhama Project kübok Supervisor Diethuvino Lhoushe lenisüba nung agi. Lai, PMMVY scheme indang metetdakja liasü.

Sentong nung o tatsüka jembiba mapang Village Council Chairman, Tebul Neikha-i, par yimtsüng nung iba sentong ayongzüka katsüba

atema line department tem aser district administration dang kanga pelaba lemsatepa liasü.

Iba inyakym nung shilem ka ama service balala agütsüogo. Service tem rongnung District Administration aser Department of Social Welfare na longjemer tetsür tanur arishi küm 0 nungi 5 tsüngda alirtem sentong agiba tesem nung Aadhaar nung züngosemstüba aser Department of Post-i Indian Post Payments Bank (IPPB) accounts lapoktsüba densema liasü. Iba enrolment camp nung yimdaklirtemi kanga yakyaka shilem agiogo.

Peren DC-i merekmeju mapa indang metetdaksü

Dimapur, Chiteni/July 22 (TYO): Peren Deputy Commissioner Hiazu Meru-i, District Planning & Development Board senden nung lemtetba ama District Officers tem dang district nung ita shia Hokolbar pezüba nung merekmeju sentong ayongzüka

agitsü, ta metetdaksüogo.

Iba dak sendakba nung Peren Deputy Commissioner-i Subdivision ajak nung Administrative Officer ajak dang pei sub-division tem nung lokti nübutoka merekmeju sentong ayongzüka agitsü asoshi anogo tapet ka lateta

ayutsü atema tetuyuba agütsüogo.

Maneni Deputy Commissioner-i, Extra Assistant Commissioner, Sadar Peren aser Head DB tem dang itashia merekmeju sentong ayongzüka agitsü aser iba indang osang benoktsü metetdaksüogo.

NITI Dimapur nung mezüngbuba Private AI Batch amenokogo

Dimapur, Chiteni/July 22 (TYO): Dimapur, NITI Dimapur Center nung July 24 nü nungi tenzüka ghonda 100 atema "Fundamentals of Artificial Intelligence" course agütsütsü aliba sangdongogo.

Iba sentong ya ita ka tsüngda tembangtsü aser course agitsü atema taah kanga dalang asütsü, kong mezüngbuba batch atema offer balaka agütsütsü.

Course ya kaketshirtem summer vacations amungba mapang ghonda 100 tsüngda tembanga agitsü.

Course atema taah ya subsidized asütsü aser mezüngbuba batch atema Smart gadgets & immersive learning tools densema offer balaka agütsütsü.

Course ajanga AI in

Business Transformation, Introduction to Data Science, Machine Learning Fundamentals & AI Applications in Healthcare amala Module tem ayimjemtsü aser Industry-Ready Case Studies & Real-World Examples den Python nung Hands-on Projects dena agütsütsü.

Iba ya Nagaland aser kidanger state tem nungi kaketshirtem, tech enthusiast, mapa bushirtem, entrepreneur aser working professional tem atema tanga state-i moi AI skills angazütsü atema maongka tajung ka asütsü. Mezüngbuba batch atema meden ishika dang asütsü. Iba maongka agitsü atema takaratiba nung züngoksemtsü metetdaksüogo.

DLSA Kiphire-i mapa inyaktsü maongka aliba indang metetdaksü

Dimapur, Chiteni/July 22 (TYO): Secretary District Legal Services Authority DLSA Kiphire-i, temsüa alir aser Advocate tejangrartem dang küm ka atema Panel Lawyer ama empanel asütsü metetdaksüogo.

DLSA-isa, mapa tazüng ana lir aser posting ji Kiphire nung asütsü ta metetdaksüogo. Applicant tem ya India lisopur asütsüla aser Bar nung küm asem dak tema tajangshiba bener alitsü nüngdaker. Applicant tem qualification aser legal experience dak sendakba nung kuli kakettem asadangba sülen shimtsü.

Mapa asoshi shimba

candidate tem indang osang official notice board aser official District Court website at <http://kiphire.dcourts.gov.in> ajanga metetdaksütsü aser teshimertem ya viva - voce atema selection committee ka matsüngdang nokdaksü. Iba committee ya Secretary, District Legal Services Authority, Kiphire lenisüba nung inyakshangshitsü.

Tejangrartem dang application form kanga junga fill up sür tawa tangokba passports size photo pezü den tenüngdakba kuli kakettem peisasa attest sür August 8, 2025 nü tashi nungbo office tongtsütsü metetdaksüogo.

Losami yimtsüng nung LSC tenzüko

Dimapur, Chiteni/July 22 (TYO): Phek kübok Losami yimtsüng nung July 22 nü 2 ako nung Legal Services Clinic (LSC) lapokogo. Meluri, Pfutsero, District Jail Phek, aser Chetheba sülen Phek District Legal Services Authority (DLSA) kübok tang Legal Services Clinic pongububa lapokogo.

Iba sentong ya Retainer Lawyer Phek DLSA Sekhotso Rokha lenisüba nung agi. Sentong nung o jembiba mapang pai tejaokertem aser sentong nung shilem agirtem ajak pelashishia agizük aser Legal Service Clinics indang metetdakja liasü.

Sentong ya Associate Pastor, Losami Baptist Church-i Tsüngrem temaotsü meshizüka sarasademer tenzüka liasü.

Sentong nungsa Village Council Chairman, Losami Zechete Mekrisuh-i lokti pela agizükba o jembiba, shibai iba service yimtsügi bener arutsüba atema kanga pelaba lemsatep.

NJS, District aser Sessions Judge cum Chairperson Phek DLSA Mezivolu T. Therieh-i,

Legal Services Clinics indang jembiba liasü. Lai legal clinic aser medical clinic na medemdanga jembiba aser nüburtemi item centre tem ajanga koda angati legal teyari agitettsü, iba indang metetdaksü.

Laisa, Constitution of India nung Article 39A indang jembiba, koba tebandang makai ajak nem ochi obendang agütsütsü asoshi angati legal teyari agütsütsü atema latetja aliba indang lir.

Sentong nung o tatsüka jembiba mapang Deputy Commissioner of Phek Rhosiethe Ngouri, NCS-i, clinic ayongzüka agitsü atema jenjang agiba asoshi Losami yimtsüng nem tenünsang agütsü aser local justice system nung Customary Laws aser customary courts koda sendaktepa ali iba indang lemsatepa liasü.

Kasa mapang nung Nagaland Legal Services Authority indang Member Secretary Neiko Akami, NJS-i, India sorkar kübok legal aid schemes balala indang metetdaksü, koba kübok panel lawyer temi nüngdaka alirtemnem angati legal service agütsür, ta ashi.

Dhankhar-i tatong Tir menden nungi anen

New Delhi, Chiteni/July 22 (Agencies): Hombarnü tzüngluruwa mongpu senden tenzükba anogo nung linük tatong Tir aser Rajya Sabha chairman, Jagdeep Dhankhar-i ketdangsüa nikongdang 4:00 ako tashi senden amenba sülen pai ajungbena tatong Tir menden nungi anenba osang sangdong.

Nikongdang 3:53 ako meta sorkar sangdong ka ajanga, Bodhbarnü tatong Tir, Dhankhar-i Jaipur yimti semdangtsü, ta metetdakja liasü.

Parliament senden tagidak mapang nung pai Jaipur yimti semdangtsü osang sangdongbaji aikati mamangteti liasü, ajisüaka ghonda ishika lir Dhankhar-i ajungbena pai tatong tir menden nungi anenba sangdong.

Pa tatong tir kümsük abensatsü atema ano küm ana anünga liasü.

Pai shidi ka ajanga Tir, Droupadi Murmu dang, "Kü temang anepalutsü aser medical tetuyuba tashi angaa ni linük temzüng nung Arrla 67(a) kübok India tatong Tir menden nungi anener," ta metetdaktsü.



Taküm March ita nung pa temang mejungi akümba sülen AIIMS nung temelungjang surgery ka agia liasü. June 25 nüa Nainital nung sentong ka nung jembidang pa süchia ao.

Ajisüaka yashi Parliament tenzükba anogo nungbo pa temang kanga junga dang liasü, saka ajungbena pai tatong Tir menden nungi anenba agi aika süngmanger.

Tang arrshi küm 74, Dhankhar-i 2022 küm August ita nung office mapa agizük aser 2027 küm nung ang pa kümsük tembangtsü liasü.

Tamalen R Venkatraman, S

D Sharma aser K R Naryanan nunger Tir akümba sülen menden nungi anena liasü aser V V Giri bo Tir election nung Independent candidate ama tokteptsü atema menden nungi anena liasü.

Dhankhar-i züluba shidi nungjisa pai Tir Droupadi Murmu, Ato kilonser Narendra Modi, Council of ministers aser MP ajak dang pa kümsük mapang nung pa nungita yaripa atema pelaba lemsatapa lir.

Parliament senden tetenzük anogo nung Dhankar-i Allahabad High Court nung Justice Yashwant Varma agientsü atema onük benoktsü asoshi temelaba agüja liasü.

Iba dak alia Dhankar-i Rajya Sabha nung opposition lenir Mallikarjun Kharge nem o jembitsü atema mapang talangka agütsü; ibaji ruling party-ibo ashishia liasü.

Treasury benches-ibo, Operation Sindoor atema o entepba mapang nung ang Dhankhar-i Kharge nem mapang agütsütsü melatsüla, ta ashi.

Parliament senden Bodhbar anüngdang 11:00 ako tashi thinen

New Delhi, Chiteni/July 22 (Agencies): Mongolbarnüa Lok Sabha aser Rajya Sabha naprongla nung Opposition züngsemtemi tang Bihar nung tagidak Special Intensive Revision (SIR) anema longkak aitba sülen July 23 anüngdang 11:00 ako tashi senden thinen.

Mongolbarnü Lok Sabha senden tenzükba sülen minute ishika dang lirbo anüngdang 12:00 ako tashi thinen liasü. Rajya Sabha nunga oppoition züngsemtemi yimyim ayima longkak aitba sülen nikongdang 2:00 ako tashi senden thinen.

Senden nung timtem agütsüba atema opposition aija Union Parliamentary Affairs Minister Kiren Rijiju-i, o lemteptsü atema sorkari melunga dang lir, saka Opposition-i longkak aitba ajanga nüburtem sen amajok nung laludaktsü, ta ashi.

Rijiju-i, "Parnoki (opposition) o lemteptsü akhanger, aser onoki iba atemaji renema lir. Süra kechiba senden agitsü atema parnoki memelar? Nenoki o lemtepnüra timtem magütsütsüla.

O lemteptsü atema onok renema dang lir ta sorkari shiogo. Nenoki public sen amajok nung laludaktsü," ta metetdaktsü.

Rajya Sabha nung menden MP Jagdambika Pal-i Bodhbar anüngdang tashi senden thinenba sangdongba den külemi Opposition dang senden nung ozülü amer longkak aittsü melenbo temepishiba onüktem aser bangzüngtem ang benoktsüla, ta ashi.

Mongolbarnü Lok Sabha nung Opposition lenir Rahul Gandhi aser Samajwadi Party Tir Akhilesh Yadav na den opposition MP tem Parliament House kima nokdaker Bihar nung Special Intensive Revision (SIR) anema longkak ait.

Opposition MP temi SIR mapatong aija "India nunger temeden auyar," "Democracy tepseter" ta ozülü balala amer longkak ait.

Tang Parliament nung opposition-i Operation Sindoor atema o lemteptsü akhangba den külemi Bihar nung SIR mapatong ya agientsü akhanger.



July 22, 2025 nü Kerala yimtiba, Thiruvananthapuram nung Kerala Angh, Rajendra Vishwanath Arlekar-i taoba mapang chief minister aser CPI(M) lenir, asür V S Achuthanandan nem akhüm agütsüdang tangokba noksa nung angur. Hombarnü Achuthanandan alima nungi pilaogo; pa arrshi küm 101 liasü.

SIR atema Aadhaar, voter ID aser ration cards magitsü: EC

New Delhi, July 22 (Agencies): Election Commission-i Bihar nung electoral rolls atema Special Intensive Revision (SIR) benokba anema ken o angadanga mapang nung Supreme Court-i EC dang SIR atema Aadhaar card, voter ID card aser ration card agitsüla, ta shia liasü.

Ajisüaka Election Commission-i Supreme Court dang, Aadhaar ya maitsü kuli ka dang lir, linük nung ration cards taila aika lir, aser tang aliba voter cards ji agira tang tagidak SIR ya amajok nung agir asütsü, ta metetdaktsü.

Nikongdang affidavit ka ajanga EC-i SC dang, SIR mapatong ya ozüing alema masü aser voters temeden anema masü, ta shia Court dang opposition party 11, melungtet

teloktem aser Bihar nung alirtem kari SIR anema benokba temepishiba ken otemji agientsüla, ta mepishi.

Taküm November ita nung Bihar nung assembly election agitsü lia EC-i benokba SIR anema Supreme Court nung ken o aika benoka lir. July 10 nü item ken o angadanga mapang nung Supreme Court-i Election Commission dang maitsü jangjatsü atema Aadhaar, Voter ID cards aser ration cards-a agizüksüla, ta EC dang shia liasü.

July 10 nü ken o angadanga mapang nung SC-i, "Document balala reprangba sülen ECI-i voters jangjatsü atema documents 11 lir ta ashi. Anungji Aadhaar card, EPIC card aser Ration card-a züngsemsüla. Item documents ji agizüksü mesüra magizüksüji ECI melung, ajisüaka parnoki iba

atemaji kuli tejangja ashitsüla, aser item kulji ajanga (SIR anema) temepishiba ken o benokertem melung südaktsütsüla," ta metetdakja liasü.

SIR anema ken o benokertem rongnung ADR, RJD MP Manoj Jha, TMC MP Mahua Moitra, Congress lenir K C Venugopal, NCP (SP) lenir Supriya Sule, CPI lenir D Raja, aser CPI (ML) lenir Dipankar Bhattacharya nunger densema lir.

Iba ken o ya maneni July 28 nü angadangtsü.

Tang Bihar nung Chief Electoral Officer lenisüba nung District 38 nung Election Officers, assembly constituency 243 nung Electoral Registration Officers aser Assistant Electoral Registration Officers 963-i item maparen inyakdar.



New Delhi, July 22, 2025: Mongolbarnü Parliament senden tagidak mapang nung Parliament House kima Lok Sabha nung opposition lenir, Rahul Gandhi, Samajwadi Party MP Akhilesh Yadav, RJD MP Misa Bharti, DMK MP Kanimozhi Karunanidhi aser opposition INDIA teloktep nungi MP temi Bihar nung Special Intensive Revision (SIR) anema longkak aйдang tangokba noksa nung angur.



SANGDONGER

North Eastern Region nung **North Eastern Region Strengthening Scheme-IX kübok 2019-24** kümsük Transmission tariff atema petition aser 2024-29 tariff block assets atema transmission tariff determination.

1. Tekalen shia aliba Transmission system nungi beneficiaries ji : (a) Assam Power Distribution Company Limited (b) Meghalaya Power Distribution Company Limited (c) Government of Arunachal Pradesh (d) Power and Electricity Department, Mizoram (f) Electricity Department of Puducherry (g) DOP, Nagaland (h) TSECL aser (i) MUMIL lir. Tariff osang tejangja:

a) 2019-24 block		(Rs. in Lakhs)					
Asset Detail	DOCO	Completion Cost as on 31.03.2024		2019-20	2020-21	2021-22	2022-23
Asset-1	01.04.2023	583.62	Revised AFC based on trueing up	--	--	--	113.84

b) 2024-29 Block		(Rs. in Lakhs)					
Petition No.	Asset detail	Completion Cost as on 31.03.2029		2024-25	2025-26	2026-27	2027-28
Petition-1	Asset-1	637.17	AFC	116.77	119.90	121.58	120.81

3. Determination of tariff atema application copy ka applicant indang website **www.powergrid.in** nung lir.

4. Petition nung aliba determination of tariff proposals nungji teblemba kar lira mesüra tashishiba kar danga lira beneficiaries densema nisung mashie kati Commission indang e-filing portal ajanga mesüra tezüluba nung Secretary, Central Electricity Regulatory Commission, 6th, 7th & 8th Floor, Tower B, World Trade Centre, Naoroji Nagar, New Delhi - 110029 nem agütsütsü akok (mesüra tanga address, Commission indang office alidak agütsütsü akok), iba denji külemi iba notice agütsüba sülen anogo 30 tsüingda corporate office indang address nung copy ka petitioner nem agütsütsüla.

Place: Gurgaon
Date: 23.07.2025
Sd/-
General Manager
(Commercial)

POWER GRID CORPORATION OF INDIA LTD.

(A Government of India Enterprise)
Registered Office: B-9, Qutab Institutional Area, Katwaria Sarai, New Delhi 110 016
Corporate Office: Saudamini, Plot No. 2, Sector-29, Gurgaon, Haryana 122 001.

A Maharatna PSU



TIR YIMYIM YIMOBILEM (EDITORIAL)

DIMAPUR RASEMNÜ

CHITENI 23, 2025

Ali atsüngdaksüba timtem

Asen lima nung dang masü saka tesem aika nung nisungtemi government li atsünga agiba agi lenmang lendi mesademi akümer aser kilentzü nokdanga yur tzünglu tilaka aru majung motzü agi tzümetzüng küma nübortem timtemdaksür. Ano, nisungtemi government li atsünga agiba ya yimti nung dang masü saka arem wazüka ayuba tesemtem dena atsünga agiadoker aser yangji government-i ngua yim akümer aser itemji government-i nokdangtsü melen tagizükang agizüker. Aji oda, Nagaland nung, talisa, Kohima aser Dimapur ama nung nisungtemi government li agiadoba aser government li nung arem wazüka ayuba lepdoker yim akümbatem lir. Atangji, ibaji nisungtemi tashiyim agi atsünga agiadokba masü saka government nung alirtemi temelaba agütsüba agi government li agi pei li kümer alibatem aika lir. Aji oda, Nagaland nungbo government li anüksü asoshi ita sen dalang agütsür shimteta yutsür ketdangsertemiang government li lepsaa ayoker aser pei asoshia lazüker ta asüba tatalokba otsüa aika lir. Iba jagi tanü Dimapur nung timtem aika ajurudagi. Atangji, nüngdak nung government li nisungtem nem timi lazüka agütsüba atema kecha mali, saka government li agütsüba agi yimti merenloktettsüsa aser motzü aolen makatsüsa government nung tashi akartemi inyakra, pei ket nung tajung inyaksü yimten tashi keta alidang tamajung inyaker asütsü. Tanü asenok asoshi tangazüksü kaji, Assam nung government-i wazüka ayuba arem atsünga yim akümertem aser yimti nung government li atsünga agia alirtem aridokba mapa ya asütsü. Assam nung arem wazüka ayuba ali acre lakh ter dak tali nung yimtsüng küma alirtemji teimbaka Bangladesh nungi arur bendangertem lir. Ano, tang Assam government-i government li atsünga agia alibatem tanaben meyipa agiadoktsü merangba tesemtemji nisungtemi agiba dang masü saka government kübok aliba kongsangtemia agia lir. Ibayongji, Guwahati Metropolitan Development Authority kübok aliba tesem ka nungbo Indian Institute of Hotel Management ki yanglua aliba dena bensatsüogo aser nisungtemi atsünga agia aliba tesemtema alinungtsü gari amshia nungtokyonga odagi. Aji oda, Assam nungbo tang ya külen yimti nung ozüing alema kiojen yanglua aliba bentoktsür aser külen government meyong arem wazüka alidak yim küma alirtem aridoker ta yimten tashi amshia inyakra mapang ka lir. Atangji, asen lima nunga Dimapur nung tesem kar nungbo temelaba magii government li nung kiojen yanglua alibatem bentoktsüba nguogo. Iba jagi Nagaland nung government meyong rongsen kümzüka ayutsü asoshi inyakra tashi tilaka sayuogo. Ajisüaka, Nagaland nung aser talisa Dimapur nungbo government li atsünga agiba ya temelaba melii agibabo aika malitsü saka government nung ketdangsertemi temelaba agütsür atsüngdaksüba teimba asütsü. Ibaji dang masü saka Nagaland nungbo pei nija li nunga government teteyuba aser tazüokba kecha mali, kiojena pei yanglunütsü yangludaksür, anungji ashiko, nisug kari yimti ajanga ayimba ayong temdang ki yangluyonga asen government-ibo kecha mashitsü südi. Aji oda, tanübo Dimapur nung tzünglu arudang motzü taolen maka ser kiojen atsüngbangba ya government-i nübortem ali atsünga agiba agi aser kiojen pei yanglunütsü yangluba agi ataloker ta bilema nübortem aitsür, ajisüaka aji tsüraburtemi tanur mazüoktet ser tanurtemang aitsür ama aser arogo nung lenirtemi tamangertem junga anepalu mesütet ser atsüngzüka odaksüba agi tamangertem aitsüba amai lir. Item ajak nungji, shitakba agibo, nübortemji masü, tanurtemjia masü aser tamangertemjia masü saka tsüraburi tsürabur, arogo lenirtemia arogo lenirtem aser government nung alirtemia peiasasa pei tashimaitba indang rajema peiasasa pei aitsütsüla aser peiasasa pei shisatsü aser tangatetba metongshir, ozüingi kechi ashir aser pei lima aser nübortem asoshi kechi inyaksü tim ta asüba nung alima ajungtsü aser nübortem timmatemtsüsa inyaksü tim.

OLEMSABANG


Anü tatsük nungi kümzüka alitsüym

CMO Mokokchung, Nagaland

(Yashi adok nungi...)

MEINYAKTSÜLATEM (DON'TS)

- * Anüngdang toroto mapang12:00 ako nungi 3:00 ako tashi nung yimdongi maotsü merangtsüla
- * Anüngdang moapu nung mapa tasak meinyaktsü merangtsüla.
- * Tetsüng tesa mesenzütsüla.
- * Meyi mapang anüngdang tatsükba mapang soruchioktsü mapa matemzüktsüla. Iba den soruchiokba mapang window aser kishi lapoka ayutsüla.
- * Yi, süngo, coffee aser carbonated soft drinks mesüra koba shingi (sugar) agi tanang tajemtsütem lir itemji majemtsü merangtsüla kechiyong item ajemba ajanga temang nung tzü aliba rosepdaksür mesüra tepin nung tatutsü atudaksür.
- * Protein kanga aliba chiyungtsü aser mapang talangka yua aliba chiyungtsütem machitsüla.
- * Tanur mesüra kidang metsüba shiruru mena yutsür gari anena meyutsütsüla. Gari telung nung tatsük adokba ajanga timtem ajurutsü ana nung lir.



HEAT ADVISORY

Mapa inyaker aser kiburtem asoshi (For employers and workers)

- * Tajemtsü tzü temokong mapa inyakra tesem nung ayutsüla aser minute 20 shia tzü marok kakabo ajemtsüla.
- * Anü pua meinyaktsü merangtsüla.
- * Mapa inyakerkem akhüm nung inyaksü asoshi kilembok yanglua amshitsüla.
- * Mapa tasaktem anepdang aser nikongdang inyaksü tasa yanglutsüla.
- * Moapu nung inyakdang mapang shia anisüngzüka amentsüla. Tajemba agi ghonda(1 hour) shia minute pungubo (5 mints) anisüngzüka amentsüla.
- * Radio angaa, TV repranga, Newspaper zünga tzü mopung osang meteta alitsü nüngdak. Tawa tanü tzü mopung osang tejangja metettsü asoshi India Meteorological Department (IMD) website <https://mausam.imd.gov.in/> nung angutsü.
- * Mapa inyaker timba bushitsüla mesüra mapa melongi inyaksüla.
- * Mapa inyaker ajak tatsük tizüktetba nisung asütsüla. Temokong tesem nungi arurtem asoshi hopta ka dang tema nungang tatsük tizüka yimya süpar. Anungji parnok asoshi mezüing hopta nungbo anogo nung ghonda asem tema meinyaktsüla. Tanem tanemi dang mapa inyakra mapang atsülanga aotsüla.
- * Mapa inyakerkem dang anü tatsük ajanga timtem adokdaksüba tsüngsü aser tamaittsütem metetdakja sayutsüla aser parnok rongnung"buddy system" koba tetezü medemer/angkopur telungtet tenzüksüla kechiyong aiben pei sasa pei dak timtem aliba merajemer.
- * Ajungben timtem lendong nung First Aid agütsütettsürpur alitsüla aser koda masüba mapang yakta teyari bushitsü asalendong yanglua alitsüla.
- * Mashisa aliba aser temang nung timtem meteta aliba inyakerkem mesüra mozü techidakpur doctor den angateteper dang inyaksüla.
- * Moapu nung inyaksü süra cotton süoshi tepongba, kokra temang ajak küpbangtetba tola and long pants, aser tokolak anü nung mepolokdaksüi inyaksüla.
- * Mapa inyakra tesem nung temperature aser forecast sayuba kol inoka ayutsüla.

Lokti adenshiba/Saisapong sentong nung tekümdangtsütem (Precautions during mass gathering/sports event)

- * Moapu mesüra Kilung nung lokti adenshiba sentongtem nung tatsük adoka timtem bena arutsü ana nung lir.
- * Temang tashi amshia inyakra, anü polokba, lokti aika adenshiba, aser tajemtsü tzü, chiyungtsü aser akhümbok maliba ajanga karbo temang nung timtem bener arutsü akok.

Lokti ajak temang nung tzü peria alitsüla, mokonga alitsüla, anü tatsük ajanga bener aruba timtem tamaittsütem meteta alitsüla aser nüngdak süra mozü/ mozüki bushitsüla.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Nisung meyrjang aika adenshia John MacArthur nem akhüm agütsü



Pastor John MacArthur den tatembangbuba asüpila sentong agitsü atema California nung aliba Grace Community Church Tenla kidangi tasümang bener arudang tangokba noksa nung angur.

July 22, 2025: California nung aliba Grace Community Church nung küm 50 dak tali pastor inyaksang, John MacArthur den tatembangbuba asüpila sentong nung nisung meyrjang aika adenshia pa nem akhüm agütsüogo.

John MacArthur ya nüngtugu pastor ka aser Laishiba tesayur ka liasü. 1969 küm pai tenzükba Arogo Tenla kidang asüpila sentongji agiba sülen tasümang remtsüogo.

Pai Lai tekong ajak junga rateta tesayuba agütsüba ajanga alima tesem ajaklen tamangertemi pa meteta aküm. Pai The Master's Seminary tenzuka alima tesem balala nungi tamangertema nem training agüja liasü.

Pa den tatembangbuba asüpila sentong nung par kibong, Arogo nung lenirtem aser züngsemtemi pa ya sannüker ka, tesayur ka aser ajemaluba lenir ka ta shia pa nem tetushi agüja liasü. Asüpila sentong nungji osangtajung kentem aten, Lai azüng aser pai inyakba mapatem bilemteta pa nem tetushi agütsü.

Pastor aser kaketzülur, John MacArthur taoba hopta 'pneumonia' agi shiranga hospital-i anir aoba sülen mapang tatsüka tsüngda asü; pa arrshi küm 86 liasü.

John Fullerton MacArthur Jr. ya 1939 küm June 19 nü Los Angeles, California nung aso. Pa taoba mapang Los Angeles Pacific College (tangbo Azusa

Pacific University) nung Bachelor of Science degree angu aser Biola University's Talbot Theological Seminary nung Master of Divinity degree angu. Pa graduate asüba sülen küm asem lir 1969 küm nungi tenzuka pa Grace Community Church of Sun Valley, California nung pastor aser tesayur küm 50 dak tali inyaka aruogo.

John MacArthur-i pa akümli mapang nung 3,300 ben dak tali sayutsüngiogo aser Khristan kaket aser biblical study guides kaket 400 dak tali zülüogo.

MacArthur-i yarisema 1986 küm Master's University & Seminary tenzuka liasü aser 2018 küm tashi iba Seminary nung pa Tir inyaka liasü.

Pak nung Tsüngrem atalaba ozüng tim mesüi amshiba bushisüngdangtsü

July 22, 2025: Anogo ishika tejaklen Pakistan nung federal court kati linük nung Tsüngrem atalaba ozüng tim mesüi amshiba tatalokbatem bushisüngdangtsü atema anogo 30 tsüngda inquiry commission ka tentetang, ta sorkar nem tetuyuba agütsüogo.

Pakistan nung Tsüngrem atalaba ozüngtem kübok mapang shia Khristanem nem tiyazü nung tai tonglokja apur.

Iba ozüng kübok aibelenertem taküm piyong tepuokdak ayutsü akok mesüra tasüba temerenshia agütsütsü akok. Pakistan nung ketdangsertemi iba ozüng kübok aibelenertem nem tasüba temerenshi obendang agütsür, saka tang tashi nungbo shinga nem-a tasüba temerenshi magütsü.

Ajisüaka iba ozüng kübok tai tonglokja alirtem loktii azükba mesüra tepsetba tatalokbatembo aika lir. Tang Pakistan nung court kati iba ozüng tim mesüi amshiba tatalokbatem bushisüngdangtsü tuyuba ya Khristanem aser minorities atema osangtajung ka lir.

Taoba Mongolbarnü Islamabad High Court (IHC) nung Justice Sardar Ejaz Ishaq

Khan-i Tsüngrem atalaba ozüng tim mesüi amshiba tatalokbatem bushisüngdangtsü atema Inquiry Commission ka tentetsü tuyu.

Pakistan nung Tsüngrem atalaba ozüng kübok tiyazü nung tai tongloktsüba ajanga takoksa angur 100 dak temai High Court dang, Federal Investigation Agency (FIA) kübok anti blasphemy unit, lawyer tem aser tangartemi asalentong yanglur Khristanem densema tai maket nisungtem nem tai tongloktsür, iba sülen parnoki akhangba ama parnok nem senotsü magütsüra parnoki ken o benoktsü ta Khristanem amokmerener, ta metetdaksü.

Ajioda ketdangsertem nem sen magütsürtem anema ken o benoker, ta parnoki court nem metetdaksü.

Iba temepishiba ken o ya mezüng yaküm September ita nung Islamabad High Court nung benoka liasü, iba sülen court-i 42 ben tashi iba ken o angadanga aruba sülen tesüsa taoba Mongolbarnü federal sorkar dang anogo 30 tsüngda investigative commission ka tenteta Tsüngrem atalaba ozüng tim mesüi amshiba tatalokbatem bushisüngdangtsü tuyuogo.

Centre for Research and

Security Studies (CRSS)-i ashiba agi, Pakistan nung 1947 nungi 2021 küm tsüngda Tsüngrem atalaba ken o 701 liasü aser item ken o nung nisung 1,415 nem tai tongloktsü (tebur 1,308 aser tetsür 107). Item ken o nung tai tonglakja alir nisung 89 bo tepsetogo aser nisung 30 dak tali yirutsüogo.

Tsüngrem atalaba ozüng kübok tai tonglakja alirtem tebur 72 aser tetsür 17 tepsetogo, aser parnok ajakji loktii tepsetba lir, ta CRSS-i metetdaksü.

National Commission for Human Rights-i report ka ajanga, 2023 küm October ita nungi 2024 küm July ita tsüngda Pakistan nung Tsüngrem atalaba ken o nung tai tongloktsüba kanga bulua atalokdar, ta metetdaksü.

2020 küm item ama ken o 11 benoka liasü, 2021 küm ken o 9 benok, 2022 küm ken o 64, 2023 küm ken o 213 aser 2024 küm nungbo July ita tashi nung ken o 767 benoka liasü, ta parnokisa metetdaksü.

Pakistan nung nütsüng shilem 96 bo Muslim nungertem lir. Tang alima nung Khristanem alitsü atema linük tamajungtiba 50 rongnung Pakistan ya jenjang 8buba nung lir (Open Doors' 2025 World Watch List).

ANOGO ABEN TSÜNGREM DEN

Masatangtetba Tsüngrem temeim

Anungji pai aposo aser pei tebu dangi aru, saka pa apiga nung alidang, pa tebui temolung aria bilem, aser asüma ao, aser pa tekong nung azüa, pa dak tebang mesep (Luk 15: 20).

Kodaker tebu Tsüngremi alima meimchir dang komama meimer ajaki kanga junga metetta lir. Laishiba nung ashi, Tsüngremji temeim nung talubosa aliba Tsüngrem. Pai alima aser yangji aliba nisung meimchir dang memeim asübo, pei ajaso chir taküm tenla magütsüla, aji asenoki lai nung kuli tejangja angur. Iba Lai tekong nung ashibaji nisung ka jabaso ana liasü aser kati tebu dang pa senmang ajak meshizüka bener orr külen, masüba lenmang nung itemji lalushipong aser tesülen pa kanga tim atem, anungji pai tatem nung pei tebu dangi meyipa aotsü molungtet aser yamaji pai inyak. Kodang pa tanaben tebu dangi meyipa shilang, tebui pa dang kechi inyak aser kechi ashi ? Tebu-i pa dak orr tebang mesep aser kilirtem dang san napong tajungba tepseta, benjong tulu ayongzüktsü metetdaksü. Tebui pei chir tasü liasü saka pa tanaben taküm lir ta ashi. Iba mapa ya asenok ali shi nung alir nisung temeim ka asübo, iba ama nisung kaji tanaben meyipa arudang kechi koma ka inyakla? Saka Tsüngremji temeim nung talubosa aliba Tsüngrem asünung pai aremzüka tanaben agizük.

Yamaji Tsüngremi pa chirtem kodanga mesendoker. Pai ajak dang sakuku meimer aser nisung shinga mesamadaktsüner, aji saka meimchirtemi pa nungi atsüngzüka aor, mesüra pa nungi lenmang tamajungi pelaa aor yamaji süaka, Tsüngremi asenok kodang tanaben meyipa arutsü aji dang yongyaseta ataa alir. Kechiaser Pai kata mesamadaktsüner. Temenen nung asonger aliba taküm ka, kodang tanaben Tsüngrem dangi meyipa arudir, idangji pai pelaseta agizüker aser idangjisa tatok agütsür. Anungji shinga-ia nibo temenen tulu lir, oda Tsüngremi kü nembo tatok magütsütettsü südi ta mebilemtsüla. Pai ajak kümzükner, saka iba telemtetba agitsübaji asen alima meimchirtem molung. Nisungi kechi molungtetdir, yangji Tsüngremi kechiba ? ta masüngdangtsü. Saka tajung aser tamajung bendanga shimtsübaji asen molung. Anungji ajaki shisa kaa tajungtiba shimtettsübaji kanga tongtipang. Tsüngremi tatok magütsütettsüsa temenen kecha mali. Tanü nai nü tai temenen Pa dang rapoka ashitsü molunger asü ? Pai nü nem tatok agütsütsü molunga lir aser na arutsü yongyaseta nokdaka lir, na kodang arudir, Pai nü dak tebang mesepa na tanaben agizüktsü ta yangi Pa o ajanga nenshia ashir.

Tesüiba ita ka tsüngda Iran linük nung Khristan 43 puogo

July 22, 2025: Israel aser Iran na tsüngda rara anenba anogo- June 24, 2025 anogo nungi tenzuka tang tashi nung Iran tesem balala nung Khristan 43 puogo, ta Khristan melungtet telok Article 18-i metetdaksü.

Iran yimtiba, Tehran nung aliba Evin Jail nung puoka aliba Khristan aika rongnungi Khristan 11 bo mejangjaba tesem kati anir ogo, aser parnok tia atema shisabulua bilemtsür, ta Article 18-i metetdaksü.

Tawa Iran nung apuba Khristanem rongnung Islam yimsü toktsür Khristan yimsü agizüker arrshi küm 43, Aida Najafloo densema lir.

Aida-i, la densema

tepuokdak alir tetsür 60 Qarchak Jail-i belenogo. Iba jail nung parnok nem tzü temerük magütsür aser chiyungtsü peria magütsür, ta metetdaksü.

Aida-i Islamic Republic of Iran anema jembi, sarasadem, tangartem baptitsü aser online ajanga Khristan yimsü dak sendakba osangtem prok, ta la aija jail nung puok.

Laishiba ya ozüngi memelaba kaket lir, ta shia la aitsü. Laisa social media ajanga yimtenren lenirtem aitsü, ta la nem tai tonglokja liasü.

Tang alima nung Khristanem alitsü atema linük tamajungtiba 50 rongnung Iran ya jenjang 9buba nung lir (Open Doors 2025 World Watch List).

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim


Terokzü

- (n) terok nung aliba tezü, chizü (windpipe)
* Tebang nung ola adokba ya terokzü nungi adoker.

Terong

- (n) süngdonglidong külemi aika adoka alidak (clump)
* Süngküm terong ka nung süngküm aika alir.

OLONG PAITEP # 7217



TIPLÉN

1. Nisung tereprangtsü - (4)
3. Tesüiba aonung - (6)
6. Ne kinüngtsü tetsü - (3)
7. Ken atema külemi ali - (6)
8. _____ ng - (7)
12. Ajaki tsübur aser moner - (6)
13. Mapang - (3)
15. Nisung ajaki ajuruogo - (6)
16. Tekong sobutsü - (4)

LANGTSÜNGLEN

1. Tereprangtsü balala bendanger - (6)
2. Bendena - (6)
3. Temepishiba o - (11)
4. Naga kin-i meraba shiruru ka - (2)
5. Shitak masüa ta ashiba o - (5)
9. Tagidak maka nisung - (6)
10. Timtem nungi jenbu - (6)
11. Nisung ka yimya - (5)
14. Tsük tedong - (2)

OLONG PAITEP # 7216 TELANGZÜBA


TIPLÉN :

1. Sentsü, 3. Alar, 6. Nikongdang,
8. Tai, 9. Sen, 11. Perangpong,
12. Tama, 13. Samesa.

LANGTSÜNGLEN :

1. Süngdong, 2. senchi, 4. Lenden,
5. Odi, 7. Tazüngla, 8. Temeim,
9. Sangma, 10. Hai.

NAI-A YA METETTER MA



Alima nung mezüngbuba underground railwayji 'London Underground' liasü aser ibaji 1863 küm lapok. Iba nungji station 275 aser rail lenmangji mile 253 liasü.

Sorkar scheme agitsü atema Aadhaar mandatory masü: Meghalaya HC



Shillong, Chiteni/July 22 (Agencies): Meghalaya High Court-i Hombarnü, sorkar indang scheme balala nungi tajangzük agitsü asoshi maitsü jangjatsü atema Aadhaar card kija masü saka tanga identification kuli kakettem agitsü, ta obendang agütsüogo.

Okadang ajanga ketdangsürtem dang Aadhaar number magütsünürtem mesüra magütsütetertem atema tanga identification kuli kakettem tem agizüktsü tetuyuba agütsüogo.

Chief Justice Indra Prasanna Mukerji aser Justice Wanlura Diengdoh nati kümtetba division bench kati ashiba agi, Aadhaar card malirtem aser züngoksemtsü asoshi memulungertem nem PAN

card, voter ID, mesüra passport amala kuli kaket tejangjatem amshitsü temelaba agütsütsüla.

Aadhaar malirtem iba dak ajemdaker sorkar scheme balala agitsü asoshi menokdangtsüla, ta obendangrtemisa jangja jangja metetdaksüogo.

Greneth M. Sangma-i benokba Public Interest Litigation (PIL) ka angadangba mapang iba obendang ya agüja liasü.

SC/ST lokti atema post-matric scholarships kübok fee compensation atema apply asüba kaketshirtem mesüra tanga scholarship atema temsüa aliba SC/ST kaketshirtem senotsü teyari agitsü atema apply asüba mapang Aadhaar number ya kechi südir süaka agütsütsüla

ta state sorkari tetuyuba agütsüba anema petitioner-i iba ken o benoka liasü.

Toba mapang Supreme Court-i obendang ana agütsüba dak ajemdaker Sangma-i, Aadhaar Act, 2016 Section 7 nung iba amala ken o nung Aadhaar ya mandatory kümdaksütsü atema state nem temelaba agüja mali, ta ashi.

High Court-ia, Aadhaar maliba ajanga sorkari teyari agütsüba nokdanga mayutsüla, ta shiogo.

State-i maitsü takaratiba nung jangjatsü atema Aadhaar amshitsü akok, saka kasa mapa atema tanga official kuli kakettema amshitetsü.

Iba ken o ya ano August 12, 2025 nü angadangtsü court-i latettsüogo.

Centre-i Assam nunger aluyimertem nem teyari agütsütsü nangzük

Guwahati, Chiteni/July 22 (Agencies): Krishi Bhawan, New Delhi nung Union Minister for Agriculture, Farmers' Welfare, aser Rural Development, Shivraj Singh

Chouhan aser Assam indang Minister for Agriculture, Horticulture, Animal Husbandry, and Veterinary Services Atul Bora na Hombarnü senden ka menogo.

Union Minister-i, Assam nung aluyimertem district balala nung tzümetsüng aser tsüngsarosa agi timtema aliba süoki ia bilemba lemsatapa liasü. Chouhan-i Assam nunger

lenirtem dang, tang ama timtem mapang Assam nung aluyimertem den Centre sorkar nokdaka lir aser takokba tashi teyari agütsütsü renema lir ta ashi.

Chouhan-isa, tensa tajungba angatetsü aser timtem nung aliba aluyimertem den sensak asemstsü atema Assam nung tzümetsüng agi kongshir aliba tesemtem semdangtsü asoshi pa sentong aliba lemsatapa liasü.

"Assam nung timtem agi kongshir aliba aluyimertem ajak nem teyari agütsütsü onok bendanga agütsür lir. Sorkari parnok kija timtemtsü asoshi

metoktsütsü," ta pai shisem.

Assam nung aluyimba jenjang ajungkettsü atema Union Minister-i, Indian Council of Agricultural Research (ICAR) dang, rajma, masoor, arhar, sunflower, fodder maize, garlic, aser onion amala Assam nung ajungba aonsotsü tapet variety tem metetdaksütsü tetutyuba agüja liasü.

Iba senden nung Union Agriculture Secretary Devesh Chaturvedi den Assam indang agriculture department nungi ketdangsürtemi shilem agia liasü.

Assam Police-i ozüing alema inyaksangshiba telok ka apu

Guwahati, Chiteni/July 22 (Agencies): Assam Police-i Sonitpur district nung tesem ka meita aoba mapang ozüing anema inyaksangshiba telok ka nungi nisung tenet apu aser prangbong injang aser tanga hadirtem aika ngutetogo.

Arunachal Pradesh tenemtsüng nung amenoka aliba tesep ka madoktsü asoshi police-i iba meita aoba sentong ya benoka inyaka liasü. Iba inyakyim ajanga rakzükrakdemba maparen balala benoka inyaksü atema

sentong aliba raksatsüogo.

Itangitertem nungi osang tejangja angazükba sülen Dhekiajuli Police Station nungi team kati Sonitpur district nung tesem ana meita oa liasü.

Iba meita aoba sentong ya Senior Superintendent of Police (SSP) Barun Purkayastha lenisüba nung agi, aser parnoki meita aoba tesem nung nisung pongu apu aser tangar ana bushia aoba sülen pua liasü.

Kasa mapang nung police temi prangbong injang aser tanga hadirtema ngutetogo.

Parnoki 7.65 mm pistols ana, injang 16, country-made rifles ana, traditional 'khukris' (curved knives) ana nguteta liasü.

Sepaitem yagi Sopai ayong anasa Arunachal Pradesh den arrtsü anasa tenemtsüng nung Tharaibil tesem nung khi atema tesep ka yanglur aliba maktokogo.

Iba tesep ya arem min nung yanglur liasü aser iba ya ozüing alema inyaksangshiba telok tasa balala asaba tesem ka asütsü ta amanger. Police-i iba tesep raksatsüogo.

Nüngdak süra Iran nuclear facilities amaktsü: Trump

Washington, Chiteni/July 22 (Agencies): United States-i nüngdak dang süra ano Iran indang nuclear facilities amaktsü ta Donald Trump-i amokmeren tesashi agütsüogo. US tiri pa indang social media sapang Truth Social nungsa CNN dang taila osang ta aja.

Iran Foreign Minister Abbas Araghchi-i Fox News dang Tehran-i uranium enrichment program metoktsütettsü ta ashiba sülen Trump-i iba tekum dangtsü ya ashi.

"Ibai anena lir, kechiaser teraksa kanga tesashi lir. Saka onoki enrichment meyutsütettsü, kechiaser ibai ozü scientist indang takok lir," ta Foreign Minister-i taoba ita Israel-Iran rara nung raksatsüba indang Hombarnü ashi.

"Aser tangbo iba dang tali ibai linük indang konang ka lir," ta pai ashi.

US aser Israel nungeri amak dang Iran nung nuclear facilities raksatsüba ya kanga tesashi liasü aser ano maneni asadangtar, ta Araghchi-i ashi.

Araghchi-isa Iran indang Supreme Leader Ayatollah Ali Khamenei temang junga lir aser Washington den jembishinü akatsü Tehran mulunga lir, saka tang atemabo indang-indanga

ajurutepa jembishinü masütsü ta ashi.

Araghchi-i iba o ashiba sülen Trump-i pa indang social media sapang nung, "Ni ashiba ama itemji (nuclear sites raksaogo), aser nüngdak dang süra onoki ano inyaktsü!" ta zülu.

Taoba ita nunga Trump-isa US-i Iran indang nuclear sites nung amakba ya operation tetangshi liasü ta ashi aser Iran-i maneni nuclear programme amshira ozü linüki ano amaktsü ta tekum dangtsü shia liasü.

US tembar Israel-i June 13 nü Iran amak aser Middle East nung tsükchir linük ana ya anünglen anogo 12 rara aser iba mapang Washington-i Iran indang nuclear facilities nung bomb poklokja liasü.

June ita tatemlen ceasefire ka yanglua liasü.

Iba sülen US tayimtsü amshia mamak dang Iran-i nuclear oset tem belener liasü ta sangdonga aliba osang Trump-i magizük. Item tesem nung mapa inyakterem ya uranium stockpiles belenerba masü shafts tem meyibangerba liasü ta Trump-isa ashi.

Pentagon indang intelligence arm ajanga preliminary assessment agiba nung US-i amakba yagi Iran indang nuclear sentong ya ita ishika asoshi ang soita

yutettsü ta bushitet, ta CNN dang osang ka ajanga shia liasü.

Iba assessment ya Defense Intelligence Agency ajanga renem aser US Central Command aianga amakba sülen asadangba nung ajemdaker lir, ta osang ajanga ashi.

Iran ya Nuclear Non-Proliferation Treaty nung dena lir aser Israel ya maden.

United Nations nuclear watchdog-ibo Iran nung 'active, coordinated weapons program' aliba tejangja monguteter ta ashir.

Tehran-i par nuclear sentong ya civilian atema kisüing lir ta ashir.

Middle East nung nuclear nok-nü aliba linükji Israel ya kisüing ta amangeraser pari Iran den raraba ya Tehran-i par nuclear nok-nü yangluba nungi nokdangtsü nükjidong nung lir ta ashir.

Rara metenzükdang Oman tetsüingtai ia Tehran aser Washington ya nuclear ken o ponguben tashi jembishinüa liasü, saka Iran nem koba tashi uranium enrich südaksütsü, iba indang telemtetba kati marutet.

Iran-i mela-mela nuclear nok-nü yanglutettsüsa uranium enrichment mapa inyaker ta Israel aser Washington nati ashir, saka Tehran-i iba enrichment program ya civilian nüngdak asoshi kisüing lir ta ashir.

Ukraine aser Russia yimjung ken o jembib tenzüktsü: Zelenskyy

Kyiv, Chiteni/July 22 (Agencies): Bodhbarnü Russia aser Ukraine na Istanbul nung yimjung ken o jembibtsü, ta Ukraine Tir Volodymyr Zelenskyy-i ashi.

"Tanü ni [Ukrainian Security Council chief] Rustem Umerov den tepuokdak alirtem melenteptsü aser Turkey nung Russia den ano senden amentsü atema jembia liasü," ta Zelenskyy-i anogoshi linük den jembiba nung shilem ka ama Hombarnü jembidang ashi.

"Umerov-i meeting ya Bodhbarnü amentsü renema lir ya ashi."

Anogo 50 majung dang Moscow aser Kyiv tsüingta ceasefire melira temerenshi tulu agütsütsü ta US Tir Donald Trump-i Russia amokmerener anogo ishika lir Zelenskyy-i asendenshir yimjung asoshi jembishinü tenzüktsü hopta tatemlen benoka liasü.

Jembishinü nungi sayatenya lia telemtetba tajung kati arutsü meimlar, ta Moscow-i Mongulbarnü ashi.

"Onoki onok tejangraba bushitsü tebilemba lir, ozü tejangraba nung takok angutsü aser tetenzük nungi renema akaba mapa takok ngua inyaktsü," ta Kremlin odongtar Dmitry Peskov-i osangbener dang ashi.

Paia jembishinü tan hopta alitsü imlar ta ashi saka anogo tejangja magütsü.

Russia-i tesashiba amak tenzükba sülen Washington-i Ukraine mitkar asoshi nok-nü tasen agütsütsü nangzükogo.

Mongulbar nep Ukraine anüdoklen Kramatorsk yimti nung Russian glide bomb kati apartment block ka nung kongshia tanur ka asü, ta yangji aliba ketdangsür temi ashi.

Kyiv nunga tesem trok nung drone

aser missile meyokteper amak.

Ukraine sepaitemia Ukraine anüdoklen Pokrovsk nung 50 ben dak tali amakba meyipa yokogo ta ashi, kong Russia-i ita ishika temulung agütsür maka arur.

Russian sabotage groups tem yimti telungi aittsü merang tenzükogo, ta Ukraine indang military commander Oleksandr Syrskiy-i ashi.

Tang tesüsa jembishinü ya Brehostibar aser Hokulbar anogotem alitsü ta Russia indang RIA news agency ajanga ashi.

Turkey sorkar indang odongtar kati ashiba agi, May aser June ita ceasefire asoshi jembiba tesem kasa nung Bodhbarnü senden ya amentsü, ta Agence France-Presse news agency ajanga ashi.

Tan hopta jembishinüba ya küm asem jak dang tenzükba rara tatem kati arutsü merangba ka asütsü, aser Trump-ia Vladimir Putin dang tezü atangba lemsatepa lir.

US tiri Putin dang mepelar saka tatem masü ta shia lir.

Tepuokdak alirtem melentepba aser Zelenskyy aser Putin ajuruteptsü nung rangloker Istanbul jembishinü akatsü, ta Ukraine ketdangsür kati ashi.

Ajisüaka Moscow-ibo tangsa tangbo telemtetba tajung kati marutettsü ama ashi.

Linük ana ya khenyongi balala nung lir aser diplomatic mapa teinyaktsü jenti lir, ta Kremlin odongtar Dmitry Peskov-i osangbener dang hombarnü ashi.

Russia-i tawa Ukraine yimtitem nung drone aser missile amshia amakba tali kumogo aser civilian aika asüba osang lir.

Russia-i 2022 küm tetenzüklen nungi tashi ajak amshia Ukraine maka arur.

Iran-i China aser Russia den nuclear atema senden amentsü

Tehran, Chiteni/July 22 (Agencies): Iran-i ayonga China aser Russia den Mongulbarnü high-level senden ka amentsü, ta Iran Foreign Ministry odongtar Esmail Baqaei-i Hombarnü sangdong.

Iba senden nung Iran indang nuclear programme aser United Nations ajanga temerenshi agütsüba nung rangloksü ta ashi.

Aji masü dang Baghaei-isa Iran-i Britain, France aser Germany den Istanbul nung Hokulbarnü nuclear ken o jembibtsü ta ashi.

Jembishinü metenzükshira Iran dangi international sanctions tanaben bener arutsü ta European linük asem yagi tekum dangtsü agütsüba sülen iba osang ya sangdong.

"Iran, Britain, France aser Germany tsüingta senden ya deputy foreign minister jenjang nung amentsü," ta Baghaei-i ashi.

June ita Israel aser US ajanga Iranian nuclear facilities amakba sülen E3 linük idang foreign minister tem aser European Union indang foreign policy chief temi Iranian Foreign Minister Abbas Araqchi den Brehostibarnü phone ajanga jembia liasü.

European linük asem den China aser Russia ya Iran den 2015 nuclear deal yangluba nung anünga aliba teloktem lir, koba nungi 2018 nung US ainshi, koba ajanga Middle East linük nung nuclear programme mechi tenok dangba agüja aliba agien.

Israel-Iran anünglen nungi rara metenzükdang anendaka aliba nuclear ken o jembib metenzükshira August ita tatem tashinung "snapback mechanism" ajanga Tehran nem US sanctions tanaben agütsütsü ta E3 yagi tekum dangtsü shia lir.

"EU/E3 ajanga shilem aginüra, parnoki süoki ia inyaktsüla, aser amokmerena aser tsükshiba policy tejen yutsütsüla aser yanghi 'snapback' dena lir," ta Araqchi-i hopta tetenzüklen shia liasü.

UN Security Council pangzüng nung mela aliba ama iba deal October 18 nü metembang dang UN sanctions tanaben benoktsü asoshi snapbach mechanism ya amshitettsü.

Israel-Iran rara metenzükdang Tehran aser Washington tsüingta nuclear ken o jembib senden ponguben mena liasü, koba

Oman tetsüingtai ia ayongzük.

Ajisüaka talisa Iran indang uranium enrichment mechi jembishinü nung tetsükdaktsü ajuru.

Nok-nü meyangludaktsütsü mechi anüolen linük temi Iran nuclear sentong ya anendaktsütsü nükjidong lir.

Kasa mapang Iran-i par nuclear sentong ya civilian amshitsü atema dang lir ta ashir.



NETTEC COMPUTERS

KOHIMA
KEDITSU BUILDING 2ND FLOOR,
P.R.Hill Junction,
Kohima, Nagaland -797001
Phone: 0370-2950325,9233430892

MOKOKCHUNG
TONGPOK MANSION
Arkong Ward,
Mokokchung, Nagaland-798601
Phone: 369 796 2828,9366889372

BIG ANNOUNCEMENT!!!
EXCLUSIVE DISCOUNT
ON (CIT)
CERTIFICATE IN INFORMATION TECHNOLOGY
GET FREE COURSE MATERIALS!!
AVAILABLE COURSES

Certificate in Basic Computing
Certificate in Information Technology
Honors Certificate in Information Technology (HCIT)
Refresher Course (MS Office)
NSSB (Computer Knowledge and Awareness)

Certificate in Desktop Publication/Graphic
Certificate in Revit Architect
Certificate in AutoCad
Certificate in Web Designing

 [netteccomputers](#)

 <https://www.nettec-computers.com>

 netteckohima@gmail.com

Prannoy-i match points 5 kümzüka 2buba round-i iogo



CHINA OPEN SUPER 1000

Chiteni/July 22, 2025

(Agencies): Mongolbarnü China Open Super 1000 asayamung mezüngbuba round nung India nunger badminton asayar HS Prannoy-i match point pongu kümzüka Japan nunger asayar Koki Watanabe kokogo.

World No. 35 Prannoy-i Watanabe ya 8-21, 21-16, 23-21 agi kokogo, shiba world rankings nung tang 18buba nung lir.

Ajisüaka Lakshya Sen atemabo anogo tamajung liasü, shiba maneni junga masayateti arudar. Pa mezüngbuba round nung China nunger fifth seed asayar Li Shi Feng-i 21-14,

22-24, 11-21 agi koka liasü.

"Kü indang career nung tang yabo asaya akokba ajak ya kanga tongtibang lir. Ni asayamungtem nung shilem agitetba atema pelar. Asayaba jenjang kanga melenshiogo aser round ajak nung takok angutsü tasakba akümer," ta Prannoy-i Watanabe akokba sülen ashi.

"Tebur kija asaya nung ajungbena dang asayartem timba arishi küm 22 aser 23 tsüngda alirtem dang kümogo. Asayar tasen aika lir aser ni parnok asaya memetet. Anungji asayar tejen ka asütsü tasak lir," ta Prannoy-i shisem.

Mezüngbuba game nung Prannoy-i junga masayatet aser Watanabe-i asaya ayona

ayonga dang koka liasü.

Ajisüaka tanabuba game nungbo Prannoy-i asendenshir court tajungba ayimjema asayaba den asaya kanga junga aziüoka asaya aser decider asayatsüsa aküm.

Tatembangbuba game nung Prannoy 2-11 agi tesülen liasü, saka iba sülen pai point pongu atonga ngua point tawa tilaba kumdaktsü. Ajisüaka pai point 15 dang nguteter aliba mapang Watanabe point 20 jungatok aser match points pongu angu. Ajisüaka Prannoy-i kanga süngjemshir asaya-a match points pongu kümzüka aser 21-20 agi pa tejakdang aküm aser iba sülen asaya koka liasü.

Prannoy taruba asaya sixth seed Chou Tien Chen den asayatsü.

India tsürtem rongnungi Anupama Upadhyay-i mezüngbuba round nung Chinese Taipei tsür Lin Hsiang Ti 23-21, 11-21, 10-21 agi mekoki tsükogo.

Tarep temeyoktep asayar A Surya o A Pramuthesh aser Rohan Kapoor o Ruthvika Gadde nungera mezüngbuba round nung tsükogo.

Carlos Alcaraz National Bank Open nung masayatsü

Chiteni/July 22, 2025

(Agencies): Spain nunger nüngtugu tennis asayar Carlos Alcaraz-i ashiba agi, hopta aika anisüngzüik makai asayaba sülen pa taruba National Bank Open nung masayatsü atema telemtetba agiogo, kechiyong pa tetsü nung timtem tila ka lir aser taruba US Open atema aneper liner.

Iba it tetenzüklen Wimbledon final nung Alcaraz-i to top-ranked asayar Jannik Sinner mekoki liasü.

Kasa mapang nung Sinner-a National Bank Open nungi masayatsü atema telemtetba agiogo, aser temaba jenjang nung aliba asayartem rongnung Alexander Zverev dang anungogo.

"Hopta aika anisüngzüik makai toktepba sülen ni taküm Toronto nung masayatetsü. Ni tetsü nung timtem tila ka lir aser ni taruba asayamung atema shitemang aser tekelok shisatsü ajak asüngsashir alitsü nüngdaker," ta Alcaraz-i Mongolbarnü tweet asü.

Alcaraz-i Canada nung küm ana tejakdang tajungba asayar lir, saka iba küm pa quarter nung America nunger asayar Tommy Paul-i tsükdakja liasü.

"Carlos amala asayar ka masayatetsüsa akümba ya tezüdangtsüka lir, kechiyong onok fan tem pa reprangtsü atema yongyaseta ata liasü," ta tournament director Karl Hale-i ashi.

"Pa mapang tatsükabo asayaogo saka pa career tangang tetenzükler lir anungi Canada nungertem tarutsü nung pa asayaba reprangtsü atema maongka peria angutsü," ta Hale-i ashi.

America nunger Sebastian Korda aser Poland nunger Hubert Hurkacz nata yiruba ajanga iba asayamung nung masayatetsüsa kümogo.

Küm ana tejakdang Toronto nung Canadian ATP Masters 1000 asaya ya Sinner-i koka liasü. Novak Djokovic-i iba asayamung pezüben koka lir saka pa-a masayatsü. Taylor Fritz, Lorenzo Mussetti aser Holger Rune nungerbo asayamung nungi tang tashi matsüingini lir.

India Head Coach mapa atema Fowler, Stephen nungeri apply süogo

Chiteni/July 22, 2025

(Agencies): Taoba Liverpool striker Robbie Fowler aser taoba coach Stephen Constantine na India tebur football team head coach mapa atema apply asür rongnung densema lir. Manolo Marquez-i iba ita tentenzüklen mapa toktsüba sülen India tebur football

team head coach mapa tazüing kümogo.

AIFF-i iba ita tetenzüklen advertisement sangdongba sülen Constantine aser Fowler na densema candidate 170-i coach mapa atema apply süogo.

Fowler ya 2020 nungi 21 tashi East Bengal team coach liasü.

Arishi küm 62 tain Constantine ya 2002 nungi 05 tashi aser 2015 nungi 2019 tashi ta anaben India team head coach mapa inyakogo. Ano pa Indian Super League 2022-23 season nung East Bengal coach liasü.

Constantine ya tatemsa Pakistan team head coach liasü. Pa lenisüba nung Paki-

stan team-i asaya ka akok, ka draw asü a ser ti mekoki liasü.

September ita international window ka lir, saka India-i iba ya menepa coach meshimtetra taruba coach atema mezüngbuba mapaji October 9 aser 14 nü Singapore den Asian Cup qualifiers asayatsü aliba ya asütsü.

Taoba mapang Australia aser Liverpool forward Harry Kewell-ia iba mapa atema apply süogo. Pa tatemsa taoba küm Yokohama F Marinos nung coach mapa inyaka liasü. Maneni tang Indian Super League nung tinyakdak coach asemia iba mapa atema apply süogo.

Jamshedpur FC coach Khalid Jamil, Sergio Lobera aser Andrey Chernyshov nungeria apply süogo. Lobera-i Mumbai City den Indian Super League ana aser FC Goa den Super Cup ka kokogo.

Bryan Mbeumo Manchester United nung denogo

Chiteni/July 22, 2025 (Agencies):

Cameroon nunger international asayar Bryan Mbeumo Brentford nungi Manchester United nung officially denogo, aser 2030 küm tashi asayatsü atema tenangzüktepba yangluogo.

Arishi küm 25 tain winger yagi Hombarnü ashiba agi, pa ina atuba mapang United indang shirt sema liasü aser tang pa iba club nung adenba ya nükjidong atalokba ka lir.

United-i pa atema asemben tashi bid asüba sülen Brentford-i taoba ita agizüka liasü.

"Manchester United nung adentsü maongka lir ta jangja akümba sülen ni adentsü jangra aliba club nung ya adentsü atema iba maongka ya agitsüla ta bilem," ta Mbeumo-i ashi.

Mbeumo taruba season United nung No.19 tola asemtsü.



Mokokchung District Taekwondo Association (MDTA) tenüing nung arishi küm aser weight category balala nung asayar 33 taruba '35th Nagaland State Taekwondo Championship 2025 aser Under-14 Taekwondo Catch Them Young Tournament' nung asayatsü. Iba asayamung ya July 29 nungi 31 tashi Longleng nung asayatsü. Asayartem ya MDTA ketdangsürtemi Ladybird Hr Sec School nung July 21 nü shima liasü. Iba asayamung tatembangbuba ya 2024 küm Phek district nung asaya aser iba asayamung nung MDTA team-i category balala nung medal 18 ngua liasü.

BILEMDANGANG

"Temelenshi bener arutsü atema mezüngbuba jenjang agitsü metsübutsüla."